

《佛說婆羅門避死經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 2, No. 131

No. 131 [No. 125(31.4)]

佛說婆羅門避死經

後漢安息沙門安世高譯

聞如是。一時婆伽婆。在舍衛城祇樹給孤獨園。爾時世尊告諸比丘。昔有四婆羅門仙人。精進修善法五通。常恐畏死。時四婆羅門仙人。精進修善法五通。便作是念。我等當住何處永存在世。時彼有一婆羅門。精進修善法。有大神力五通。便入空中。於中則無有死。彼入空者便命過。第二婆羅門。精進修善法五通。畏死便入大海中。我於海中則無有死。彼即於海中命過。第三婆羅門。精進修善法。有大威勢五通。畏死便入山腹。即於彼命終。彼第四婆羅門。精進修善法五通。有大威勢。畏死便入地。我於彼當脫不死。便於地命過。時世尊以天眼見清淨無瑕。觀彼四婆羅門精進修善法。有大威勢五通畏死。一人處虛空於彼命過。一人入海亦於彼命過。一人入山腹於彼命過。一人入地於彼命過。爾時世尊見彼四婆羅門精進修善法五通有大威勢。便說偈言

非空非海中 非入山石間

無有地方所 脫之不受死

爾時比丘聞佛所說。歡喜奉行

佛說婆羅門避死經